



CONCELLOS

ANTAS DE ULLA

Anuncio

CONTA XERAL 2025

En cumprimento do disposto no artigo 212 do Texto Refundido da Lei Reguladora das Facendas Locais aprobado por Real Decreto Legislativo 2/2004, de 5 de marzo, e unha vez foi debidamente informada pola Comisión Especial de Contas, en sesión de data 14 de maio de 2026, expónse ao público a Conta Xeral correspondente ao exercicio 2025, por un prazo de quince días, durante os cales quen se estimen persoas interesadas poderán presentar as reclamacións, reparos ou observacións que teñan por convenientes.

Antas de Ulla, 15 de maio de 2026.- A alcaldesa, M. Pilar García Porto.

R. 1264

Anuncio

APROBACIÓN DEFINITIVA DA ORDENANZA REGULADORA DO USO COMÚN ESPECIAL DO DOMINIO PÚBLICO LOCAL POLAS ACTIVIDADES EXTRACTIVAS DE MADEIRA NOS MONTES E ESPAZOS FORESTAIS

Por Acordo do Pleno de data 14 de maio de 2026, aprobouse definitivamente a Ordenanza reguladora de Ordenanza reguladora do uso común especial do dominio público local polas actividades extractivas de madeira nos montes e espazos forestais, o que se publica aos efectos dos artigos 70.2 da Lei 7/1985, de 2 de abril, Reguladora das Bases do Réxime Local.

«EXPOSICIÓN DE MOTIVOS

O sector forestal e a actividade madeireira con el asociada, representan un sector económico moi relevante neste Concello, tanto pola súa extensión como polo seu impacto na sustentabilidade económica dos veciños.

A explotación forestal do monte e, concretamente, o transporte dos aproveitamentos do mesmo, nomeadamente o transporte, **depósito e carga, así como o desprendemento involuntario de materiais asociado ao tráfico forestal**, entre outros, derivado da corta de madeira polas vías de titularidade municipal, supón un uso do dominio público municipal dunha intensidade que, en moitos casos, impide o uso normal xeral por parte do resto dos usuarios/as das mesmas polo deterioro que producen no firme das mesmas os usos antes nomeados.

Por outro lado, os danos producidos polos usos antes referidos, obrigan ao concello a realizar **gastos extraordinarios** para o mantemento do viario municipal que soporta estes tráficoes en condicións que permiten o uso normal e xeral dos camiños e vías municipais aos cales ten dereito a veciñanza e a xeneralidade dos usuarios/as calquera que sexa o seu lugar de residencia; é dicir, o concello vese obrigado a facer estes esforzos orzamentarios para facer fronte aos danos producidos polos tráficoes referidos de forma que se poida compatibilizar tales usos cos usos normais e xerais aos que están, precisamente, destinados. Dito doutra maneira, de non existir un uso das vías municipais por parte das empresas madeireiras que antes referíamos, o mantemento dos mesmos para o uso común xeral por todos os cidadáns soamente precisaría de gastos ordinarios que son os que comunmente se fan nas vías non usadas polo transporte, depósito e carga, derivado da corta de madeira.

Tal uso, polas súas especiais características derivadas dos medios empregados, así como da súa intensidade á que se someten as vías de depósito e saca da madeira cortada, configuran un **USO COMÚN ESPECIAL** das vías municipais, de conformidade co establecido polo artigo 75.1.b) do Regulamento de Bens das Entidades Locais, aprobado por Real decreto 1372/1986, do 13 de xuño. Uso especial que a presente Ordenanza regula.

Procede precisar que a presente Ordenanza regula o uso especial do dominio público viario municipal e non os aproveitamentos forestais en si, materia esta última de competencia exclusiva da Comunidade Autónoma de Galicia (art. 7 da Lei 7/2012, do 28 de xuño, de montes de Galicia, e art. 27 do Estatuto de Autonomía). En virtude do art. 11 da mesma Lei 7/2012, as entidades locais conservan as súas competencias propias en materia forestal no marco da lexislación básica do Estado e da lexislación autonómica, entre as que se atopa a regulación do uso especial das vías municipais cando o aproveitamento implique unha intensidade ou periculosidade extraordinarias.

A presente Ordenanza opera, polo tanto, no ámbito da relación administrado-Concello respecto ao uso da vía municipal, sen interferir co réxime de declaración responsable ou autorización autonómica establecido nos arts. 92 e 92 bis da Lei 7/2012 nin coas previsións do Decreto 73/2020.

Uso especial que, como xa se afirmou, incide de forma extraordinaria nos custes de mantemento das vías municipais afectadas polo mesmo, para que poidan servir ao uso normal e común que constitúe a finalidade última das mesmas.

A pesar de que o municipio carece de competencias reguladoras da explotación forestal dos montes e da corta de madeira da mesma derivada, tamén é certo que o municipio ostenta plena capacidade e competencia para regular o uso das vías públicas municipais, así como para a defensa e policía das mesmas.

A presente Ordenanza non incide, nin directa nin indirectamente, na regulación da corta nin na actividade forestal no municipio, actividade sobre a que o municipio non ten competencia, limitándose, por tanto, a protexer as vías públicas municipais fronte ás consecuencias que o **depósito, carga e transporte** de madeira, cualificando tales usos como especiais e regulándoos de forma que se compatibilice tal uso especial que das mesmas se fai polas empresas madeireiras co uso común xeral da veciñanza e demais cidadáns. Compatibilidade de usos que para materializarse de forma efectiva **require gastos extraordinarios** a cargo do concello, ou o que é o mesmo, a cargo dos nosos veciños e veciñas que, finalmente son os que sufragan a medio de impostos e taxas que soportan.

A presente ordenanza pretende que ditos danos causados ao viario municipal sexan sufragados polos causantes dos mesmos, cando menos de maneira parcial.

A solidez xurídica desta regulación atopa apoio expreso na xurisprudencia recente do Tribunal Superior de Xustiza de Galicia. A Sentenza da Sala do Contencioso-Administrativo (Sección 4ª) núm. 108/2022, do 9 de febreiro de 2022 (recurso ordinario 15138/2021), ditada en relación con ordenanzas substancialmente análogas á presente —as aprobadas polo Concello de Ribeira de Piquín en idéntica materia— desestimou os motivos competenciais e substantivos esgrimidos pola mesma asociación recorrente que agora alega contra esta Ordenanza, declarando expresamente: *«as actividades extractivas de madeira comprenden operacións que implican unha intensidade do uso do dominio público local que se manifesta no grao de deterioro que sofre o viario municipal con estas operacións [...]. Que os camiños empregados no transporte da madeira non sexan transportes especiais, non significa que o uso ou utilización que fagan dos camiños de titularidade municipal non merezan a consideración de uso especial»* (Fundamento de Dereito 4º).

Sobre a competencia municipal e a non vulneración da Lei 7/2012, de Montes de Galicia, a mesma sentenza precisa con claridade no seu Fundamento de Dereito 5º que a regulación municipal non somete a licenza a actividade forestal, senón o uso especial do dominio público viario, e que a Administración local exerce con tal regulación o seu deber de conservación dos camiños de titularidade municipal: *«toda conservación implica intrinsecamente a regulación do uso de aquilo que se trata de conservar, mediante actos de tutela e defensa. As autoridades competentes para a conservación do dominio público sono así mesmo, para a vixilancia e regulación dos usos comúns e dos aproveitamentos especiais, polo que temos de concluír a competencia do Municipio para regular os usos dos camiños rurais»* (FD 6º).

Esta doutrina galega aliñase coa xurisprudencia consolidada do Tribunal Supremo, en particular a Sentenza do 11 de febreiro de 2014 (recurso de casación 744/2011), expresamente recollida pola STSXG 108/2022, segundo a cal: *«con carácter general o en principio, no son iguais, ni sirven por ello como términos de comparación a los efectos de aplicar aquel único precepto que se denuncia como infringido, los usos de los caminos rurales, y deterioro consiguiente, realizados por vehículos agrícolas y por aquellos otros. No lo son, incluso, aun en supuestos de vehículos de similar tonelaje, ya que no cabe descartar, sólo por ello, que incidan otras circunstancias desiguales, referidas, por ejemplo, a las frecuencias de los tránsitos y a los efectos ligados a la naturaleza del material objeto de transporte»*.

Esta doutrina non constitúe un precedente illado, senón que forma parte dunha liña xurisprudencial reiterada e consolidada. Con data de 9 de febreiro de 2022 —o mesmo día en que foi ditada a STSXG 108/2022—, a mesma Sala pronunciou un conxunto de sentenzas sobre ordenanzas substancialmente idénticas á presente, aprobadas por concellos da provincia de Lugo, en todos os casos a instancia da mesma Asociación Provincial de Empresarios de Primeira Transformación de la Madera de Lugo (LUGOMADERA). Entre as identificadas, a Sentenza núm. 107/2022 (recurso ordinario 15137/2021, Concello de A Pontenova), a Sentenza núm. 111/2022 (recurso ordinario 15136/2021, Concello de Meira), a Sentenza núm. 105/2022 (recurso ordinario 15131/2021, Concello de Riotorto) e a Sentenza núm. 109/2022 (sobre outra ordenanza luguense do mesmo paquete normativo, citada expresamente no informe da Deputación de Lugo de cooperación e asistencia ao Concello en materia de alegacións). Todas elas aplican exactamente a mesma doutrina, declarando en todo caso a conformidade a Dereito das respectivas ordenanzas reguladoras do uso común especial. A STSXG 105/2022, relativa ao Concello de Riotorto, é especialmente relevante por desestimar o recurso na súa integridade, tanto respecto da ordenanza reguladora do uso común especial como da ordenanza fiscal reguladora da taxa. A doutrina favorable á competencia municipal e á cualificación das actividades extractivas de madeira como uso especial do dominio público viario constitúe, polo tanto, xurisprudencia reiterada da Sala galega.

A competencia municipal para a aprobación desta Ordenanza emana da potestade regulamentaria do municipio recoñecida polo artigo 4 da Lei 7/1985, do 2 de abril, reguladora das bases do réxime local.

Nesta orde de cousas, recordar que o título habilitante/competencia municipal vén recollido no artigo 25.1.d), 49, 80 e 82 da Lei 7/1985, antes referenciada. No mesmo sentido cómpre invocar os artigos 74 e seguintes do Real decreto lexislativo 781/1986, do 18 de abril, polo que se aproba o texto refundido das disposicións legais vixentes en materia de réxime local; nos artigos 3, 4, 44, 76 e 77 do Regulamento de Bens das Entidades Locais, e así mesmo, nos artigos 41 e 92 da Lei 33/2003, do 3 de novembro, do Réxime Xurídico do Patrimonio das Administracións Públicas.

Entre as normas establecidas por esta Ordenanza, destacaremos:

- A existencia de licenza municipal para o uso especial regulado; licenza que vén exixida polo artigo 77 do Regulamento de Bens das Entidades Locais.
- A existencia da prestación dunha garantía que cubra preventivamente o risco de deterioros especialmente importantes polos gastos que supón a restauración da vía afectada á situación en que se atopaba antes dos depósitos e transportes autorizados.

TÍTULO PRELIMINAR: OBXECTO E FUNDAMENTO

Artigo 1.- Obxecto e fundamento.

1.1. De conformidade co disposto nos artigos 4.a) da Lei 7/1985, do 2 de abril, de bases do réxime local, e 75 e 77 do Regulamento de Bens das Entidades Locais, aprobado por Real decreto 1372/1986, do 13 de xuño; o Concello de Antas de Ulla establece a presente ordenanza reguladora do uso común especial dos camiños de titularidade municipal, con motivo das operacións de **depósito, carga e transporte** de madeira provinte das cortas de madeira nos montes do municipio.

O obxecto da Ordenanza vén constituído pola cualificación e regulación dos usos comúns especiais establecidos no parágrafo anterior, coa finalidade de garantir a necesaria e obrigada conservación do viario municipal dos deterioros producidos con ocasión dos usos especiais que se regulan.

Enténdese por uso común especial do viario municipal o **depósito, carga e transporte** de madeira, derivados de sacas de madeira provintes da explotación forestal. Cualificación que trae causa da especial intensidade que as referidas operacións levan consigo, intensidade que se manifesta no grado de deterioro que sofre o viario municipal; deterioro que non se manifesta nos transportes que de forma permanente se realizan polo resto das actividades propias do medio rural.

1.2. Quedan excluídas da presente ordenanza as pistas forestais definidas no artigo 8.25 da Lei 7/2012, do 28 de xuño, de montes de Galicia.

Artigo 2.- Actividades excluídas.

Para os efectos desta ordenanza, non teñen a consideración de transportes e acopios de madeira provinte da explotación forestal:

- Podas en plantacións forestais
- Rozas e limpezas de fincas
- Clareo de rebrotes de cepas de menos de tres anos
- Cortas puntuais de exemplares de árbores ornamentais
- Cortas para usos domésticos
- Actividades agrícolas e gandeiras

Artigo 3.- Definicións.

Para os efectos da aplicación desta ordenanza, considérase:

- **Actividade forestal:** aquela que se desenvolve a partir do aproveitamento múltiple dos recursos que proporcionan os terreos nos que vexetan especies arbóreas, sexan de nacemento ventureiro, de semente ou de plantación, sempre que non sexan características de cultivo agrícola.

- **Saca de madeira:** deberá entenderse, para os efectos desta ordenanza, a totalidade das operacións que se desenvolvan dentro do concello, que teñan por obxecto a obtención e transporte de madeira de corta, incluíndo tanto as operacións previas ou preparatorias á corta (desprazamento de vehículos e maquinaria, construción de ramplas ou accesos ás fincas, preparación do terreo, etc.) como as posteriores (preparación e depósito da madeira, cargamento e transporte).

- **Empresa madeireira:** persoa física ou xurídica que realice os labores de preparación do terreo, repoboación, corta, saca, depósito e/ou transporte da madeira. Tamén abrangue a aquelas persoas propietarias que realicen algúns destes labores nas parcelas da súa propiedade, sempre e cando non sexa para o autoconsumo de madeira e teñan por destino a súa comercialización.

Artigo 4.- Ámbito de aplicación.

O ámbito de aplicación desta ordenanza é o termo municipal de Antas de Ulla, sen prexuízo das disposicións especiais que poidan rexer en zonas cualificadas como especialmente protexidas ou espazos naturais.

TÍTULO I: AUTORIZACIÓNS E RÉXIME XURÍDICO**Artigo 5.- Requisitos para as operacións de saca de madeira.**

Para realizar traballos de saca e depósito de madeira en plantacións forestais do Concello, será obrigatorio obter a preceptiva licenza municipal para uso especial da vía ou vías municipais a empregar para o depósito e transporte de madeira.

A solicitude de licenza, asinada polo representante da empresa madeireira, deberá presentarse no rexistro do Concello, en papel ou telematicamente, ou en calquera outro dos rexistros establecidos no artigo 16 da Lei 39/2015, do 1 de outubro, do Procedemento Administrativo Común.

Elo farase sen prexuízo da necesaria obtención, con carácter previo, dos permisos ou autorizacións que, conforme á normativa vixente, sexan necesarios, xa foran da autoridade forestal, de conservación da natureza, de protección de augas ou de preservación do patrimonio arqueolóxico.

O prazo máximo para resolver e notificar a resolución da solicitude de licenza será dun (1) mes, contado dende a data de entrada da solicitude completa no Rexistro Xeral do Concello. Transcorrido o devandito prazo sen resolución expresa, a solicitude entenderase estimada por silencio administrativo, sen prexuízo do disposto no artigo 24.1, parágrafo segundo, da Lei 39/2015, do 1 de outubro, do Procedemento Administrativo Común das Administracións Públicas.

Na solicitude de licenza ou en documentación anexa deben constar:

- Datos identificativos da empresa madeireira (denominación, número do NIF, enderezo e teléfono, nome e apelidos da persoa encargada ou responsable da empresa).
- Especie de madeira obxecto da corta.
- Volume de madeira que se prevé extraer.
- Nome das fincas ou montes afectados, lugar ou sitio e parroquia, así como identificación catastral da finca ou monte afectado, indicando polígono e parcela/s.
- Datas previstas de inicio e remate dos traballos.
- Lugar onde se depositará a madeira á espera da súa carga e vías a empregar.
- Identificación das vías de titularidade pública a utilizar, así como calquera outra propiedade: nome e plano coa traza do mesmo.
- Reportaxe fotográfica do estado inicial das vías e propiedades a utilizar.
- **Copia ou identificación do expediente do permiso, autorización ou licenza de corta** expedido polo órgano competente da Comunidade Autónoma.
- Copia do seguro de responsabilidade civil ou calquera outro similar da empresa madeireira que cubra os eventuais danos e prexuízos que poidan causarse con ocasión da corta e saca de madeira, así como do último recibo pagado, acreditativo de que o seguro está vixente no momento de realizarse as devanditas operacións. O solicitante asume a responsabilidade da veracidade do documento presentado, conforme ao artigo 28.7 da Lei 39/2015, do 1 de outubro, sen prexuízo da facultade do Concello de solicitar de forma motivada o cotexo do orixinal cando a relevancia do documento o esixa, conforme ao artigo 28.5 da mesma Lei.
- Xustificante do depósito da garantía ou aval bancario.
- **Declaración responsable do titular da licenza de dispoñer dos permisos e autorizacións privadas necesarias para acceder ás propiedades, eximindo expresamente ao Concello de calquera responsabilidade derivada de discrepancias civís entre particulares.**
- Plano de situación do recorrido polo que se vai circular, así como dos espazos utilizados para o depósito e acopio, provinte da explotación forestal.

Se con posterioridade á presentación da comunicación xurdisen novos aproveitamentos de parcelas non incluídas na mesma, poderanse ir incorporando á comunicación inicial, sempre e cando se empreguen as mesmas vías de saca ou os mesmos lugares de depósito.

O Concello de Antas de Ulla terá a disposición das persoas interesadas un modelo normalizado de escrito de solicitude tal e como se recolle no Anexo I.

O Concello requirirá á empresa madeireira ou á persoa propietaria do monte ou predio forestal a presentación da correspondente solicitude, cando comprobe que a empresa madeireira non cumpriu coa súa obriga de presentar nas oficinas municipais a comunicación previa, sen prexuízo da correspondente sanción derivada do incumprimento da obriga de presentación da mesma.

Artigo 6.- Responsables.

A empresa madeireira será responsable directamente de todos os danos e prexuízos a persoas e bens que se produzan ou ocasionen con motivo do depósito e saca, depósito e transporte da madeira, debendo reparar o dano causado.

O Concello velará especialmente para que as devanditas operacións de saca de madeira non ocasionen danos nas vías públicas municipais e estas queden en axeitado estado de conservación, limpeza e seguridade.

A devandita obriga será esixible non só polos actos ou omisións propios, senón tamén polos cometidos por calquera persoa que, sen ser empregada ou traballadora da empresa madeireira, interveña nas operacións de depósito e saca de madeira, con consentimento ou aquiescencia da mesma e, en xeral, polos cometidos por aquelas persoas de quen deba responder.

As persoas propietarias das parcelas de monte nas que se efectúen actividades de extracción de madeira serán responsables, principalmente cando a corta se faga a feito en zonas con pendentes elevadas, da adopción das medidas precisas para previr tanto os riscos erosivos sobre o terreo como as posibles consecuencias da erosión sobre os bens públicos.

Artigo 7.- Obrigas.

A empresa madeireira estará obrigada a asumir os custos da reparación dos estragos producidos nas vías, nas estruturas anexas ou noutros elementos do dominio público local.

A empresa madeireira queda obrigada á limpeza e á retirada dos residuos da corta de madeira, de xeito que as pistas, camiños ou espazos públicos queden en todo momento no mesmo estado de limpeza e conservación que tiñan antes de levarse a cabo as operacións de corta e saca de madeira. A obriga de limpeza deberá cumprirse todos os días ao final da xornada de traballo.

Os depósitos de rolla, pólas, podalla ou demais restos non poderán invadir as zonas de circulación viaria, nin menoscabar a funcionalidade das cunetas, gabias, canalizacións, pontellas ou calquera outra infraestrutura auxiliar ou anexa aos camiños ou vías, de cara a evitar riscos para as persoas usuarias.

Prohíbese que os refugallos que non sexan estritamente vexetais queden ou se depositen **nas vías municipais ou no dominio público local en lugares non autorizados**. Os residuos asimilables aos urbanos seleccionaranse e depositaranse no contedor municipal axeitado. Os residuos industriais, especialmente, aceites usados, entregaranse a un xestor autorizado de residuos.

Sen prexuízo do cumprimento das obrigas que en materia de xestión de restos forestais en monte sexan esixibles conforme á Lei 7/2012, do 28 de xuño, de montes de Galicia, e demais normativa sectorial, as empresas madeireiras e/ou as persoas propietarias dos montes tratarán os restos forestais de xeito que minimicen o risco de incendio, dando prioridade aos tratamentos que supoñan a incorporación dos ditos restos ao ciclo produtivo agroforestal ou ao aproveitamento de biomasa forestal residual nas súas distintas variantes.

A empresa madeireira estará obrigada a sinalizar as vías situadas nas zonas de extracción e depósito de madeira, conforme ao establecido na normativa vixente en materia de tráfico, circulación e seguridade viaria.

Prohíbese o uso das vías públicas para almacén ou depósito irregular da madeira. Entenderase por depósito irregular, para os efectos desta ordenanza, aquel que exceda de 30 días naturais.

Prohíbese iniciar os traballos de corta e saca de madeira sen contar cos permisos e/ou autorizacións sectoriais correspondentes.

A empresa madeireira ou o propietario forestal deberán derrubar e repoñer ao seu estado anterior as ramplas abertas para facilitar o acceso ao terreo ou ao monte, co obxecto de que, cando chova, a auga e a terra arrastrada non inunden e cause danos nas pistas ou camiños municipais.

As limpeza e reparacións deberanse realizar nun prazo máximo de 72 horas a partir da retirada da madeira, **salvo que as condicións climatolóxicas o impidan, en cuxo caso o cumprimento se realizará na primeira xornada en que tales condicións o permitan, comunicándoo previa e motivadamente ao Concello**.

De acordo co disposto na normativa urbanística vixente, queda prohibido efectuar desprazamentos de terra que polas súas características deban ser considerados movementos de terra.

Artigo 8.- Fianza.

As empresas madeireiras deberán depositar unha fianza en metálico ou aval bancario en favor do Concello, co obxecto de responder dos posibles danos non reparados voluntariamente, segundo se recolle nesta ordenanza. Para os efectos desta fianza (que debe ser depositada coa comunicación previa) establécense **dous conceptos**:

CONCEPTO	GARANTÍA
Vías públicas municipais con firme de terra, zahorra ou semellante	1.200 €/km ou fracción
Vías públicas municipais con firme de formigón, asfalto, aglomerado ou semellante	2.500 €/km ou fracción

A garantía deberá depositarse na Tesourería municipal do Concello de Antas de Ulla en calquera das formas establecidas na Lei 9/2017, do 8 de novembro, de Contratos do Sector Público, o que deberá ser acreditado na comunicación previa.

No caso de que a mesma empresa madeireira vaia realizar, ao mesmo tempo, cortas en parcelas contiguas, non incluídas na comunicación previa inicial, e para os efectos do cálculo da fianza a aplicar, deberá computarse o volume total de madeira extraída desas parcelas, respectando o recollido no artigo 5 desta ordenanza.

Unha vez comunicado o remate dos traballos por parte da persoa interesada, poderá solicitar a devolución da fianza, utilizando o modelo anexo a esta ordenanza.

O Concello disporá dun prazo dun (1) mes desde a solicitude de devolución para realizar a comprobación final do estado das vías polos servizos técnicos municipais. Acreditada a inexistencia de danos, ou unha vez reparados os mesmos polo titular ou pola Administración mediante execución subsidiaria, procederase á devolución da garantía no prazo máximo dun (1) mes desde a comprobación favorable. A devolución da garantía non implica a renuncia á reclamación de danos posteriormente detectados que tivesen a súa orixe nas operacións amparadas pola licenza.

A garantía prevista neste artigo ten carácter administrativo e non tributario, non constituíndo ingreso público, salvo no caso de execución subsidiaria ou incautación conforme ao artigo 102 da Lei 39/2015.

Artigo 9.- Requirimentos. Normas comúns no uso da fianza non devolta e execución subsidiaria.

Unha vez que se advertiu o incumprimento da presente ordenanza, e de forma paralela á apertura do expediente sancionador, requirirase á persoa responsable da infracción para que se axuste á normativa e, de ser o caso, repare os danos e prexuízos causados, outorgándolle para elo un prazo prudencial fixado polos servizos técnicos municipais, que, en calquera caso, non poderá exceder dun mes, **prazo que poderá ampliarse de forma motivada cando concorran circunstancias climatolóxicas adversas que impidan obxectivamente a execución dos traballos, debendo o interesado comunicalo motivadamente ao Concello con anterioridade ao seu vencemento.** Unha vez que transcorra este prazo sen que se dea cumprimento ao requirimento, procederase, sen necesidade de novas notificacións, á súa execución subsidiaria, cargándolle os custes derivados á persoa responsable.

Constatada a destrución ou deterioro do dominio público viario local ou a acumulación de restos procedentes das operacións de carga e almacenamento, o Concello poderá realizar, repercutindo contra o obrigado, as operacións de reparación, corrección e/ou retirada de restos, sen prexuízo da sanción que proceda.

O Concello elaborará un informe técnico sobre os danos e requiriráselle ao responsable para que abone as cantidades ocasionadas por estas, mediante a tramitación do oportuno expediente administrativo, de conformidade co previsto na Lei 39/2015 de procedemento administrativo común.

TÍTULO II: INFRACCIÓNS E SANCIÓN

Artigo 10.- Infraccións.

Son infraccións da presente ordenanza os actos e omisións que contraveñan o establecido na mesma. A comisión de calquera infracción levará aparellada a imposición aos responsables das correspondentes sancións, sen prexuízo da obriga de indemnizar aos prexudicados polos danos derivados da súa comisión.

As infraccións da presente ordenanza, cualifícanse en moi graves, graves e leves.

Constitúen infraccións moi graves:

- Deixar as vías municipais nun estado de suciedade que supoña unha situación efectiva de risco para a seguridade viaria, debidamente acreditada por informe técnico municipal.
- Causar danos nas vías municipais por valor superior a 9.000,00 €, segundo informe técnico municipal emitido para o caso.
- Cometer no prazo dun ano dúas faltas graves firmes na vía administrativa.

Constitúen infraccións graves:

- Non presentar a solicitude de licenza para a realización das operacións reguladas nesta ordenanza, fose ou non requirida polo Concello a súa presentación.
- Deixar as vías municipais en deficiente estado de suciedade que, sen alcanzar o suposto previsto como infracción moi grave, exceda do estado normal de uso, segundo informe técnico municipal.
- Causar danos nas vías municipais por valor inferior a 9.000,00 €, segundo o informe municipal emitido para o caso.
- Non demoler ou non repoñer ao seu estado orixinal as ramplas ou accesos que se abran para acceso aos terreos forestais.
- Cometer, no prazo dun ano, dúas faltas leves, firmes na vía administrativa.

Considéranse infraccións leves calquera outro incumprimento desta ordenanza que non estea cualificado como moi grave ou grave e a súa sanción corresponda ao Concello.

Artigo 11.- Sancións.

As infraccións desta ordenanza serán sancionadas coas seguintes multas:

- Infraccións leves: multa de ata 300,00 €.
- Infraccións graves: multa de contía comprendida entre 300,01 € e 1.500,00 €.
- Infraccións moi graves: multa de contía comprendida entre 1.500,01 € e 3.000,00 €.

A tramitación do procedemento sancionador non previsto nesta ordenanza, rexerase pola normativa xeral na materia e, en todo caso, coa audiencia e demais garantías procesuais para a persoa interesada. O órgano competente para a resolución do expediente sancionador será a Alcaldía.

O importe das multas será graduado tendo en conta as circunstancias concorrentes e de acordo co establecido na normativa vixente.

As multas e sancións impostas ao abeiro do disposto na presente ordenanza reduciranse na súa contía nun 50%, no caso de que se aboaran no prazo de 15 días a partir da notificación da multa ou sanción, e se a persoa infractora mostra por escrito a súa conformidade con estas, e renuncia expresamente ao exercicio de toda acción de impugnación no citado prazo.

O pagamento das multas poderase esixir pola vía administrativa de constringimento, sen prexuízo da esixencia, se fora o caso, das correspondentes responsabilidades civís e penais.

As sancións serán independentes da reparación do dano causado e da indemnización de danos e perdas a que houber lugar.

DISPOSICIÓN TRANSITORIA

A presente ordenanza será de aplicación aos usos especiais comezados a partir da súa entrada en vigor.

DISPOSICIÓN DERRADEIRAS

Primeira.

A Alcaldía queda facultada para ditar cantas ordes ou instrucións resulten necesarias para a adecuada interpretación, desenvolvemento e aplicación desta ordenanza.

Segunda.

A presente ordenanza entrará en vigor unha vez que se proceda á súa publicación no Boletín Oficial da Provincia, e transcorra o prazo de 15 días hábiles previsto no artigo 65.2 da Lei 7/1985 reguladora das bases de réxime local, permanecendo en vigor ata que se acorde a súa modificación ou derogación expresa.

ANEXO I**SOLICITUDE DE LICENZA PARA OPERACIÓNS DE SACA DE MADEIRA****Datos da empresa madeireira**

Denominación: _____

N.I.F./C.I.F.: _____

Enderezo: _____

Representante/Responsable da empresa: _____

N.I.F. do representante/responsable: _____

Datos da propiedade forestal

Especie de madeira obxecto da corta: _____

Volume total da madeira (t): _____

Nome das fincas ou montes afectados, lugar e parroquia: _____

Identificacións catastrais (polígono / parcela): _____

Datos do aproveitamento forestal

Datas previstas de inicio e remate: _____

Lugar onde se depositará a madeira: _____

Viario municipal, ou outros trazados alternativos, a empregar para o transporte da madeira cortada: _____

Documentación que se achega:

- CIF da empresa solicitante e DNI do representante.
- Identificación do camiño ou vía municipal a utilizar: nome e plano coa traza do mesmo.
- **Copia ou identificación do expediente do permiso, autorización ou licenza de corta** expedido polo órgano competente da Comunidade Autónoma.
- Copia do seguro de responsabilidade civil ou calquera outro similar da empresa madeireira que cubra os eventuais danos e prexuízos que poidan causarse con ocasión da corta e saca de madeira, así como do último recibo pagado, acreditativo de que o seguro está vixente no momento de realizarse as devanditas operacións.
- **Declaración responsable do titular da licenza de dispoñer dos permisos e autorizacións privadas necesarias para acceder ás propiedades, eximindo expresamente ao Concello de calquera responsabilidade derivada de discrepancias civís entre particulares.**
- Reportaxe fotográfica do estado inicial das vías e propiedades a utilizar.
- Plano de situación do recorrido polo que se vai circular, así como dos espazos utilizados para o depósito e acopio.

Antas de Ulla, a _____ de _____ de _____.

Asdo.: _____

SRA. ALCALDESA DO CONCELLO DE ANTAS DE ULLA.

ANEXO II**COMUNICACIÓN DE FINALIZACIÓN DOS TRABALLOS DE SACA DE MADEIRA****Datos da empresa concesionaria da licenza**

Denominación: _____

N.I.F./C.I.F.: _____

Enderezo: _____

Teléfono: _____

Representante/Responsable da empresa: _____

N.I.F. do representante/responsable: _____

COMUNICA:

Que os traballos obxecto da licenza municipal por actividades extractivas da madeira concedida por acordo da Xunta de Goberno Local de data _____, remataron en data _____ de _____ de _____.

SOLICITA:

Que se devolva a fianza depositada polos traballos mencionados.

Antas de Ulla, a _____ de _____ de _____.

Asdo.: _____

SRA. ALCALDESA DO CONCELLO DE ANTAS DE ULLA.»

Contra o presente Acordo, poderase interpor recurso contencioso-administrativo, ante a Sala do Contencioso-Administrativo do Tribunal Superior de Xustiza de Galicia, no prazo de dous meses a contar desde o día seguinte á publicación do presente anuncio, de conformidade co artigo 46 da Lei 29/1998, de 13 de xullo, da Xurisdición Contencioso-Administrativa.

Antas de Ulla, 15 de maio de 2026.- A alcaldesa, M. Pilar García Porto.

R. 1265

Anuncio

APROBACIÓN INICIAL DE MODIFICACIÓN DO CADRO DE PERSOAL

Por Acordo do Pleno municipal de data 14 de maio de 2026, aprobouse inicialmente a modificación puntual do cadro de persoal vixente do Concello de Antas de Ulla, no relativo á denominación da praza PL01, nos seguintes termos:

Denominación actual: "Encargado/a Biblioteca".

Denominación que se aproba: "Director/a Técnico/a Auxiliar da Biblioteca Pública Municipal".

Mantéñense inalteradas todas as demais características da praza: réxime de persoal laboral fixo, grupo retributivo 03, xornada de vinte (20) horas semanais, salario base, trienios e demais conceptos retributivos.

De conformidade co disposto no artigo 126 do Texto Refundido das Disposicións vixentes en materia de Réxime Local aprobado polo Real Decreto Lexislativo 781/1986, de 18 de abril, sométese a información pública polo prazo de quince días, a contar desde o día seguinte ao de publicación do presente anuncio no Boletín Oficial da Provincia.

Durante o devandito prazo poderá ser examinado por calquera persoa interesada nas dependencias municipais para que se formulen as reclamacións que se estimen pertinentes.

No caso de que non se presenten reclamacións durante este período, entenderase elevado a definitivo o acordo de aprobación inicial e a modificación considerárase aprobada.

Antas de Ulla, 15 de maio de 2026.- A alcaldesa, M. Pilar García Porto.

R. 1266

BURELA

Anuncio

EXPEDIENTES 353/2026 E 354/2026 ANUNCIO EXPOSICIÓN O PÚBLICO E COBRANZA S.A.F. XANEIRO 2026.

A Xunta de Goberno Local do Concello de Burela en sesión celebrada o día 30 de abril de 2026 acorda a aprobación inicial do Padrón fiscal do Servizo de Axuda no Fogar correspondente ao mes de xaneiro de 2026 a través da Lei de Dependencia e Programa Básico de Axuda no Fogar por importe de 10.227,76 €, correspondendo 1.055,10 € a libre concorrência e 9.172,66 € a dependencia. Consonte ao disposto no artigo 102.3 da Lei xeral tributaria, por medio do presente ponse en coñecemento dos contribuíntes obrigados ao pagamento do prezo público, que dispoñen dun prazo de 15 días, contados a partir da publicación do presente anuncio no Boletín Oficial da Provincia de Lugo, ao obxecto de que poidan ser examinados e presentar as reclamacións que estimen pertinentes, entendéndose elevados a definitivos se, transcorrido o prazo de exposición pública, non se formulara ningunha reclamación.

Así mesmo, e de conformidade co artigo 14 do texto refundido da Lei Reguladora das Facendas Locais, aprobado por Real Decreto Lexislativo 2/2004, do 5 de marzo, os interesados poderán interpoñer recurso de reposición ante o alcalde - presidente, no prazo dun mes, contado dende a finalización do período de exposición pública deste padrón fiscal no Boletín Oficial da Provincia.

Contra a resolución do recurso de reposición, expresa ou tácita, os interesados poderán interpoñer recurso contencioso-administrativo ante o Xulgado do Contencioso-Administrativo de Lugo, nos prazos sinalados no artigo 46 da Lei 29/1998, de 13 de xullo, Reguladora da Xurisdición Contencioso Administrativa. Non obstante, poderán interpoñer calquera outro recurso que consideren oportuno.

Para o cobramento dos mesmos, os contribuíntes teñen domiciliados os recibos, estes seranlles adebedados nas contas bancarias respectivas. Fíxase como período voluntario de cobramento o prazo de dous meses dende o día seguinte a publicación do presente anuncio no Boletín Oficial da Provincia.

Advírtese que, transcorrido o prazo de ingreso, as débedas serán esixidas polo procedemento de prema e devindicaránse as correspondentes recargas do período executivo, os xuros de demora e, no seu caso, as costas que se produzan.